

M. ANTONII SABELLICI RERVM VENETARVM AB VRBE
CONDITA AD MARCVM BARBADICVM SERENISS.
VENETIARVM PRINCIPEM ET SENATVM
LIBER PRIMVS PRIMAE DECADIS
FOELICITER INCIPIT.

VONIAM IGITVR SATIS CON-
stat priscos Venetos & urbis & Imperii
de quo hæc scripturi sumus conditores
fuisse. nihil ab re fore existimaui quan-
do de origine gentis inter ueteres aucto-
res parum constare uideo : priusq̃ ur-
bis primordia aperiantur : de illorum
uetustate aliquid breuiter referre. Fue-
runt itaq; prisci Veneti non Italiae indi-
genæ : sed ut quidam tradiderunt a Ve-
netis Gallis oceani accolis oriundi. Neq;
hi nomen tantum secuti uidentur : Sed
quia rei maritimæ studium & gloriam :
qui Adriatici sinus oram tenuerunt : ut
illi nunq̃ neglexerint : Essentq; iis qui in Gallia sunt si non lingua : moribus
tamen & ornatu corporis : ut Polybius ait per q̃similes : Alii uero eos e Pa-
phlagonia profectos affirmant : in quibus est Liuius : Is Pylæmene Duce ad
Troiam amisso : cum Antenore in Italiam uenisse tradit : quod ipsum secu-
tus Cato Troiana stirpe Venetos procreatos credidit : Cornelius nepos & ipse
ex Henetis qui Cromnam oppidum circa Paphlagoniam tenuerunt : Vene-
tos eorum cognomines in Italia ortos existimauit : Quidam Cappadocibus eam
gentem finitimam tradiderunt : ac cum Cimeriis militasse : posteaq; Adriam
peruenisse : Alii uicum non longe ab Amastri tenuisse arbitrati sunt : Requi-
rebantq; interim tota regione Henetos quasi nusq̃ ostenderentur . Sed inter
omnes fere constat hanc de qua loquimur Paphlagonum esse gentem : quod Xe-
nodotus non solum credidit : sed Amysum quoq; oppidum id esse existimauit :
quod in ea terra postea Henetia dicta sit : Cæterum qui ita esse autumant :
præcipuam utriusq; gentis in equis mulisq; alendis industriam in argumen-
tum adducunt Homeri usi testimonio cuius illud est : Mularum genus ex He-
netis quæ robore præstent : quum de Asiaticis interim summus poeta lo-
queretur . Strabo uetustatis auctor diligentissimus nobilissimam equarum
progeniem usq; ferme ad sua tempora in his Venetis qui Adriatici maris par-
tem accolunt peruenisse scribit : quarum fama ob eximiam pernicitatem ual-
de celebris fuisset . Hæc certe atq; alia multa faciunt ut eorum sim sententiæ :
qui cum Antenore Henetos in Italiam uenisse tradunt : ac mutata littera de
inde Venetos appellatos . Antenoris aduentum in intimum maris Adriatici
sinum non solum Veneti testantur qui eius comites fuere : Sed q; locus in
quem primum egressi sunt Troia est dicta : quodq; Troiano deinde Pago no-
men mansit . Il primo pulsus suis sedibus Euganeis qui eius terræ oram : quæ
est inter mare & alpes incolebant : Patauium condiderunt : Procedente deinde

Vet^o de Ve-
netor^u ori-
gine opi-
nio

Vera Vene-
tor^u origo

Troia Pata-
uius in Vene-
tiarum